



CENTRALE BANK VAN ARUBA

Turismo lo keda e contribuyente principal na crecimiento di PDB den 2023 y 2024

Comunicado di prensa

28 juli 2023

Awe Banco Central di Aruba (BCA) a publica su 'Economic Outlook', conteniendo un actualisacion pa 2023. Tambe, un proyeccion inicial pa 2024 ta inclui.

Siguiendo e crecimiento fuerte na 2022, actividadnan relaciona cu turismo a sigui aumenta den e prome kwartaal di 2023. Den e periode ey, diferente indicadornan relata na e sector turistico, manera cantidad di bishitantenan procedente di exterior (+31,1 por ciento), promedio di e tarifa diario (+14,7 por ciento), y e entrada pa camber disponibel (+54,2 por ciento), a surpasa aña pasa. E desaroyonan aki, combina cu e subida den prijsnan general di productonan y servicionan, a duna un empuhe na e cantidad di placa cu turistanan a gasta compara cu e prome kwartaal di 2022. Adicionalmente, otro indicadornan relata na inversion y empleo a demostra un mehoracion. E desaroyonan observa den e prome kwartaal di 2023 ta duna un bista positivo di nos economia.

Pa 2023, turismo lo sigui ta e contribuyente principal na crecimiento den e producto domestico bruto (PDB), cu e expectativa cu e cantidad di bishitantenan procedente di exterior lo yega 105,0 por ciento di e nivel di 2019. Consecuentemente, e balansa di pago (BdP) probablemente lo registra un cantidad significativa di entrada atribui na turismo. Na 2023, inversion ta premira di contribui positivamente na e PDB, aunke menos cu turismo, mientras cu consumo lo baha. Importacion lo conoce un crecimiento siguiendo e desaroyonan menciona, cu lo resulta den salidanan riba e BdP. BCA ta proyecta cu e BdP lo registra un deficit di Afl. 79,7 miyon na 2023, principalmente causa pa un salida grandi riba e cuenta financiero relata na refinanciamiento di debenan di exterior riba mercado local.

Pa 2024, BCA ta anticipa cu e cantidad di bishitantenan procedente di exterior lo yega 107,0 por ciento di e nivel di 2019. Inversion probablemente lo keda riba mesun nivel, mientras cu consumo y exportacion lo subi. Como un resultado di crecimentonan den consumo y exportacion, importacion lo sigui aumenta den 2024. Esaki na su turno lo conduci na salidanan

riba e Bdp. Sin embargo, na 2024, BCA ta premia un surplus riba e Bdp, pa motibo di mas entrada relaciona cu na turismo cu ta surpasa pagonan di importacion.

Pa cu aumento den prijs, BCA ta calcula cu inflacion riba un promedio di 12 luna lo yega 4,1 por ciento na 2023 y 0,9 por ciento na 2024, empuha door di disturbionan den e cadena di suministracion, tarifa di utilidad, y medidanan fiscal.

Considerando tur loke ta anticipa anteriormente, BCA ta proyecta cu PDB den termino real lo subi cu 0,4 por ciento den 2023, causa pa aumentonan den exportacion den termino real (+3,8 por ciento) y inversion den termino real (+2,8 por ciento) (Tabel 1). Pa 2024, BCA ta premia un crecimiento den BDP di 1,2 por ciento, pusha principalmente pa expansionnan den exportacion den termino real (+4,1 por ciento) y consumo den termino real (+0,6 por ciento). Den termino nominal, BCA ta estima cu crecimiento economico lo yega 8,6 por ciento na 2023, y 4,0 por ciento na 2024. E cifranan aki ta representa un normalisacion den e tasa di crecimiento economico, tras di e subidanan fuerte observa despues di pandemia na 2021 y 2022.

Table 1: Crecemento real di PDB y su componentenan 2022-2024 (den porcentahe)

Indicador	2022 c	2023 p	2024 p
PDB	10,5	0,4	1,2
Consumo	-0,9	-0,6	0,6
Consumo priva	-1,5	-0,7	1,1
Consumo publico	0,7	-0,2	-0,8
Inversion	5,1	2,8	0,0
Inversion priva	8,1	2,8	0,0
Inversion publico	-72,6	3,8	1,2
Exportacion	28,0	3,8	4,1
Exportacion di turismo	29,6	4,3	5,0
Importacion	11,8	3,7	3,4

Fuente: BCA

c = calculacion; p = proyeccion

E publicacion completo ta disponibel riba BCA su website (www.cbaruba.org)